

MCA 'bodoh' ungkit Operasi Lalang, kata Anwar
Malaysian Insider
Feb 24, 2014
OLEH MD IZWAN

Ketua Umum PKR, Datuk Seri Anwar Ibrahim menyifatkan pemimpin MCA sebagai "bodoh" apabila cuba mengaitkan dirinya dengan Operasi Lalang 1987.

Anwar, yang juga bakal calon Pilihan Raya Kecil (PRK) Dewan Undangan Negeri (DUN) Kajang berkata, MCA sepatutnya menegur bekas Perdana Menteri, Tun Dr Mahathir Mohamad kerana ketika itu merupakan menteri dalam negeri yang bertanggungjawab dalam operasi tersebut.

"Bodoh cakap ini semua," kata Anwar semasa berucap merasmikan jentera pilihan raya PKR di Kota Cheras malam tadi.

"MCA datang sini marah Anwar saja, presiden MCA datang sini kata Anwar tangkap orang dalam Operasi Lalang, masa bila pula saya menteri dalam negeri," katanya.

Minggu lalu, Presiden MCA, Datuk Seri Liow Tiong Lai menuduh ketua pembangkang itu sebagai punca berlakunya tangkapan besar-besaran mengikut Akta Keselamatan Dalam Negeri (ISA) pada 1987.

Semasa Operasi Lalang, 108 ahli politik dan aktivis sosial ditahan mengikut ISA.

Selain itu, akhbar seperti The Star, Sin Chew Jit Poh serta akhbar mingguan The Sunday Star dan Watan dibatalkan permit penerbitannya.

Operasi Lalang dikritik hebat termasuk masyarakat antarabangsa kerana penahanan tanpa bicara terbesar pemimpin politik dan aktivis sosial semasa pemerintahan Dr Mahathir itu mencabuli hak asasi manusia.

"Sebab dia tak berani tegur Dr Mahathir, menteri dalam negeri adalah Dr Mahathir, perdana menteri pun Dr Mahathir.

"Tidak berani sentuh Mahathir, semua serang saya," kata Anwar.

Anwar juga membidas MCA supaya tidak berlagak seperti "ketua Pemuda Umno", sebaliknya menggesa parti majoriti kaum Cina dalam Barisan Nasional (BN) itu bercakap mengenai nasib kaumnya.

"Buat apa dia nak buat kerja Umno, buat apa campur?"

"Kempen baik-baik sudahlah, buat apa kamu presiden MCA cakap macam etua Pemuda Umno, tak payahlah.

"Kamu cakap bagi pihak masyarakat Cina, cakap tentang apa masalah masyarakat Cina, apa orang Cina rasa di negeri ini, bila dipermainkan, boleh tampar," katanya.

Mengulas mengenai bakal lawannya, Naib Presiden MCA, Datin Paduka Chew Mei Fun yang akan bertanding di Kajang, Anwar menggesa supaya kempen kali ini berjalan secara baik dan bersih.

"Saya kata tak apa, saya ucap tahniah kepada dia kerana diangkat sebagai calon MCA dan kita boleh bersaing secara baik.

"Tak payah maki hamun tak guna, jadi tak apa bila MCA pilih dia. Kita lawan dengan baik dalam pilihan raya," katanya.

Sebelum ini Dr Mahathir mengatakan Anwar turut terlibat dalam menjayakan Operasi Lalang pada 1987.

Sambil menafikan tuduhan Anwar bahawa beliau bertanggungjawab sepenuhnya dalam operasi yang menyaksikan pemimpin politik dan aktivis ditahan, Dr Mahathir berkata, sebagai seorang anggota Kabinet ketika itu, Anwar perlu bertanggungjawab.

"Kecuali kalau beliau berkata, saya meletak jawatan kerana tidak bersetuju. Dia tidak pernah berkata seperti itu. Beliau setuju, sokong semua termasuk ISA," katanya dalam satu majlis di Putrajaya baru-baru ini.

Kerusi DUN Kajang kosong selepas wakil rakyatnya Lee Chin Cheh dari PKR meletakkan jawatan pada 27 Januari lalu untuk memberi laluan kepada ketua pembangkang itu bertanding.

Selain Chew daripada MCA, Anwar akan berdepan dengan calon bebas seperti bekas pemimpin – pemimpin PKR seperti Datuk Zaid Ibrahim, Datuk Seri S Nalakaruppan dan N Gobalakrishnan, turut menyatakan hasrat untuk bertanding.

Suruhanjaya Pilihan Raya mengumumkan sebelum ini, hari mengundi bagi PRK Kajang adalah pada 23 Mac sementara hari penamaan calon jatuh pada 11 Mac

Hakcipta © 2013 The Malaysian Insider

Source: <http://www.themalaysianinsider.com/bahasa/article/mca-bodoh-ungkit-operasi-lalang-kata-anwar>